

**Khairy Positif Dipilih Terus Teraju Sayap Pemuda
Bernama
18 Sept, 2013
Oleh Nik Nurfaqih Nik Wil**

PUTRAJAYA, 18 Sept (Bernama) -- Ketua Pergerakan Pemuda Umno Khairy Jamaluddin yakin akan mengekalkan jawatannya memimpin sayap itu bagi penggal kedua berdasarkan rekod pencapaiannya walaupun dijangka menghadapi pertandingan.

Dalam temu bual khas dengan Bernama di sini Rabu, Khairy yang juga Menteri Belia dan Sukan, berkata keyakinan itu berdasarkan beberapa elemen yang perlu diberi perhatian oleh perwakilan sekiranya mereka serius dalam memperjuang suara generasi muda.

"Saya rasa sebagai penyandang jawatan, selama empat tahun saya jadi ketua Pemuda dan tiga penggal dalam exco Pemuda...saya rasa pertama, saya ada track record, pengalaman dan sejarah perjuangan dalam Pemuda Umno.

"Yang kedua dengan peranan sebagai Menteri Belia dan Sukan, saya dapat bawa gagasan Pemuda Umno itu melalui program-program dan juga perancangan saya sebagai menteri.

"Dan yang ketiga saya kenal semua ketua-ketua Pemuda bahagian dan ada rangkaian yang saya rasa luas dalam kalangan ahli Pemuda," katanya ketika diminta mengulas peluang beliau, sekiranya wujud pertandingan, untuk mengekalkan jawatan Ketua Pemuda pada pemilihan Umno nanti.

Sebelum ini, anak bekas Setiausaha Agung Umno Tan Sri Sanusi Junid, Akramsyah dan seorang blogger, Razman Hakimi Abdullah dilaporkan berhasrat mencabar Khairy bagi jawatan nombor satu sayap itu.

Walaupun begitu, Khairy berkata beliau tidak menganggap cabaran yang diberi calon lain sebagai remeh walaupun mereka bukan anggota Exco Pemuda atau ketua bahagian.

"Sebarang cabaran politik harus dianggap serius dan kita hormati sesiapa yang menawar diri untuk bertanding jawatan Ketua Pemuda, jadi saya serah kepada perwakilan untuk pilih," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=978668>